

## **МАЛАКА ОШИРИШ ЖАРАЁНИДА БОЛА ШАХСИГА ЙЎНАЛТИРИЛГАН ТАЪЛИМ МАШҲУЛОТЛАРИНИ ТАШКИЛ ЭТИШ ВА БОШҚАРИШ**

**Рахимова Сурайё Салоҳиддиновна  
МТТДМҚТМОИ “Мақтабгача таълим методикаси”  
кафедраси мудири**

Мақтабгача ёшда бериладиган таълим-тарбия инсоннинг бутун умри давомида фаровон ва бахтли ҳаёт кечириши учун мустаҳкам асос бўлади. Шу билан бирга, бу даврда таълим-тарбия боланинг ижтимоий, ҳиссий, когнитив ва жисмоний эҳтиёжларини ривожлантиришни мақсад қилади. Мақтабгача таълимда фаолият олиб борадиган ҳар бир педагог ҳар бир бола учун мақтабгача таълим-тарбия мақсадларини амалга оширишда муҳим рол ўйнайди. Шу боис уларга кўникмаларини ривожлантириш ва хизматларини кўрсатиш учун кенг имконият ҳамда ёрдам берилиши керак.

Шиддат билан ривожланаётган дунёнинг бугунги шароитида мақтабгача таълим ташкилотлари олдида Илк ва мақтабгача ёшдаги болалар ривожланишига қўйиладиган Давлат талаблари ҳамда Давлат ўқув дастури асосида бир мавзу бўйича бир кун ичида барча фаолият йўналишларини бирлаштирган ҳолда машғулотлар режасини ишлаб чиқишдек долзарб вазифа қўйилган. Бу мақтабгача таълимга янгича ёндашувдир.

Болалар ҳаётининг асосий қисми мақтабгача таълим ташкилотида ўтади. Педагог ҳар кун ва ҳар соатни шундай ташкил этиши лозимки, бола янги нарсаларни кашф қилсин, онги ривожлансин ва шахс сифатида шакллансин.

Демак, мақтабгача ёшдаги болаларда билим олиш фаолиятининг яхлит ривожланиш тизимини яратиш ва атроф-оламни тубдан идрок этиш имконини берадиган тизимли интеграция жараёнини таъминлаш мақтабгача таълим тизимидаги ҳар бир педагогнинг вазифасидир.

Шунингдек, болаларнинг реал шахсий қизиқишлари ва эҳтиёжлари амалга ошириладиган, болалар томонидан шахсий тажриба ва билимлар самарали тўпланадиган таълим муҳити – шахсга йўналтирилган ёндашув демакдир.

Шахсга йўналтирилган ёндашув – бу педагог эътиборини боланинг ажралмас шахсига, унда нафақат интеллектуал қобилиятлар ва фуқаролик масъулият ҳиссини ривожлантиришга бўлган эътиборини, балки ҳиссий, эстетик, ижодий мойилликлари ва ривожланиш имкониятларига эга бўлган руҳий шахсни ривожлантиришга қаратишдир. Таълимнинг асосий қадриятининг бундай эътироф этилиши шахснинг ўзига хос шаклланишидир. Педагог ҳар бир болага унинг хусусиятларини, ҳаётий қадриятларини, интилишларини аниқлаш асосида ўзларининг ривожланиш йўллари танлаш ҳуқуқини бериши лозим.

Шахсга йўналтирилган таълим-тарбия – бу:

- тарбияланувчи ва педагог ўртасидаги самимий ҳамкорлик муносабатларини;
- кун давомида амалга ошириладиган фаолиятдан тарбияланувчи ҳам, педагог ҳам ижобий эмоционал қониқиш олишни;
- мулоқот ва меҳнат орқали ижобий натижаларга эришиш ҳиссини;
- ўзига ва дўстларига ёрдам бериш кўникмаси кабиларни ривожлантириш орқали намоён бўлади.

Барчамизга маълумки, нафақат бўлажак касб эгаси, балки, кўп йиллик иш тажрибасига эга бўлган мутахассис учун ҳам ўз малакасини узлуксиз ривожлантириш муҳим ҳисобланади.

Малака ошириш жараёни катталар (андрагогика) таълими билан боғлиқлигини инобатга олган ҳолда айтиш мумкинки, ўқитувчи маҳорати орқали тингловчиларда мантиқий, танқидий, таҳлилий, ижодий қобилиятларни ривожлантириш асосида ёш баркамол шахсни тарбиялашда хизмат қилади.

Андрагогикада шахсга йўналтирилган таълим машғулотларини ташкил этиш ва бошқаришнинг айрим вазифаларини кўриб чиқамиз:

- шахснинг нидивидуал камол топиши учун зарур бўладиган ҳаётий кўникма ва малакаларини ривожлантириш;
- муаммоли топшириқларни ечишга оид назарий тушунча, амалий кўникма ва малакаларни шакллантириш;
- ижодий қобилиятларни рўёбга чиқаришга хизмат қилувчи зарур шарт-шароитларни яратиш.

Бола шахсига йўналтирилган таълим машғулотларини ташкил этишда ва бошқаришда

муаммоли таълим турлари ҳамда мустақил таълим турларининг аҳамияти каттадир. Муаммоли таълим турларини қуйидагича таснифлаш мумкин:

1. Мавзуга оид муаммоли вазиятни яратиш.
2. Мавзу доирасида муаммонинг қўйилишига эътибор қаратиш.
3. Долзарблик нуқтаи-назаридан муаммонинг ечимини топиш.

Мазкур таълим туридан ҳар қайси фан ўқитувчиси самарали фойдалана олади. Дарс жараёнида муаммоли вазиятдан қай тартибда фойдаланиш ўқитувчи ёндашувига, унинг ижодкорлигига боғлиқ бўлади.

Дарс жараёнида муаммоли вазиятдан фойдаланилганида, тингловчида қизиқиш, эътибор бериш, вазиятни ҳал қилишга бўлган интилиш намоён бўлади.

Масалан, Илк ва мактабгача ёшдаги болалар ривожланишига қўйиладиган Давлат талабларида белгиланган ривожланиш соҳалари ва кичик соҳаларни ажратиб кўрсатиш таклиф этилади.

Бола шахсига йўналтирилган таълим машғулотларини ташкил этиш ва бошқариш нинг самарадорлигини аниқлаш мезонларини кўриб чиқамиз:

- ўқитувчи ўз касб маҳоратини мунтазам ошириб боради, ижодий фаолияти ортади;
- тарбиячининг тарбияланувчилар билан индивидуал ишлашга хоҳиши ортади;
- мактабгача таълим ташкилотларида педагоглар ўртасида мониторинг қилиш имконияти пайдо бўлади;
- тарбиячининг бола шахсига йўналтирилган таълим машғулотларини ташкил этиши ва бошқариши натижасида маънавий-маърифий салоҳияти ривожланади;
- ўз соҳаси бўйича ютуқларидан хабардор бўлиш, амалий фаолиятни ташкил этиш бўйича кўникма ва малакаларга эга бўлади;
- тарбиячи ўз фаолияти давомида боланинг шахсий сифат ва қобилиятини тарбиялаш, комил инсон қилиб тарбиялашнинг шакл ва усулларини ўрганади;
- тарбиячининг мактабгача таълим ташкилотларида педагоглар ва ота-оналар ўртасида обрў ва ҳурмати ортади.

Хулоса. Таълим-тарбияда шахсга йўналтирилган ёндашув, педагог ва бола ўртасидаги яқин муносабатни, ҳар бир боланинг шахсий хусусиятларини ҳурмат қилишни ва унга дўстона эътиборни ўз ичига олади.

#### **Фойдаланилган адабиётлар рўйхати**

1. Ўзбекистон Республикаси Вазирлар Маҳкамасининг 2020 йил 22 декабрдаги “Мактабгача таълим ва тарбиянинг давлат стандартини тасдиқлаш тўғрисида”ги 802-сон қарори.
2. Шин А.В., Мирзиёева Ш.Ш., ва бошқалар. Шахсга йўналтирилган ёндашув асосида таълим жараёнини режалаштириш. Методик қўлланма (Биринчи нашр). Тошкент – 2020.
3. Евстафьева Л., Набиханова Ш., Пак С. ва бошқалар. Мактабгача таълим муассасасида таълим-тарбия фаолиятини мавзули режалаштириш. Тайёрлов гуруҳи. “Илк қадам” дастурига илова. Тошкент - 2018 йил.